

Hronika / Chronik

Izvjestaj o radu Centra za balkanološka ispitivanja u 2016. godini

Tokom 2016. godine aktivnosti Centra za balkanološka ispitivanja najvećim dijelom su bile posvećene redovnom izdavanju Godišnjaka/Jahrbucha. U prvom dijelu godine završeno je publiciranje i distribucija Godišnjaka/Jahrbucha br. 44 za 2015. godinu, dok se u drugom dijelu godine radilo na prikupljanju i obradi radova za Godišnjak/Jahrbuch br. 45. Aktuelni broj časopisa u pripremi sadržava većinom radove naučnika iz Bosne i Hercegovine (Sarajevo, Mostar, Dobo), kao i radove iz Slovenije i Njemačke. Priprema časopisa bila je otežana jer je izostala očekivana podrška Rimsko – germanske komisije Njemačkog arheološkog instituta. Ipak, zahvaljujući potpori Fondacije za izdavaštvo Sarajevo, te dodatnim sredstvima Ministarstva obrazovanja i nauke Kantona Sarajevo uspjeli smo pripremiti i ovaj broj i održati konrinuitet izdavanja Godišnjaka/Jahrbucha.

Centar i Akademija nauka i umjetnosti Bosne i Hercegovine su i tokom 2016. godine nastojali osigurati neophodna sredstva za publikovanje djela "Izvori za historiju srednjovjekovne Bosne br.1 (Ispisi iz knjiga zaduženja Državnog arhiva u Dubrovniku)" prof.dr. Esada Kurtovića, člana Centra za balkanološka ispitivanja. Ova građa obuhvata vremenski raspon od 1365. do 1521. godine i u njoj se nalaze vrlo značajne informacije za proučavanje historije srednjovjekovne Bosne. Osim popunjavanja praznina, publikacija omogućuje nova istraživanja i proučavanja podataka neobjavljene građe Državnog arhiva u Dubrovniku. Građa je recenzirana i u potpunosti pripremljena za štampu u dva toma. Dio finansija u visini od 3.000,00 KM osiguran je putem konkursa kod Fondacije za izdavaštvo Sarajevo u 2015. godini. Centar je tokom godine pokušavao obezbijediti neophodna sredstva prijavljujući se na konkurse Ministarstva kulture i sporta Kantona Sarajevo, Ministarstva civilnih poslova Bosne i Hercegovine, te Federalnog ministarstva kulture i sporta. Direktor Centra, akademik Dževad Juzbašić ulaže sve napore da knjiga bude odštampana u 2017. godini.

U izvještajnoj godini akademik Juzbašić je radio na osmišljavanju nastavka projekta izdavanja građe "Lične zabilješke generala Oskara Potioreka" koja se odnosi na drugi dio godine. S obzirom na to da je prvi dio građe uspješno publikovan tokom 2015. godine u okviru serije Građa Centra za balkanološka ispitivanja, dogovoreno je da se u saradnji sa prof. dr. Zijadom Šehićem pripremi i drugi tom koji će nositi naslov. "General Oskar Potiorek, o vojnim i političkim pitanjima od sarajevskog atentata do kraja 1914. godine".

U toku 2016. godine održan je jedan sastanak sarajevskih članova Centra za balkanološka ispitivanja i Redakcije Godišnjaka/Jahrbucha. Sastanak je održan 13.4.2016. godine uz prisustvo domaćeg člana ANUBiH i urednika časopisa prof.dr. Blagoja Govedarice, prof. dr. Adnana Busuladžića, prof.dr. Esada Kurtovića, prof. dr. Dubravka Lovrenovića i stručne saradnice mr. sci. Melise Forić Plasto. Na sastanku je razmatran plan rada Centra za 2016. godinu sa naglaskom na kontinuirano izdavanje Godišnjaka/Jahrbucha, usvojen je prijedlog izmjene u Pravilniku o izdavanju Godišnjaka/Jahrbucha, razmatrana je saradnja u Godišnjaku/Jahrbuchu. Na spomenutom sastanku aktuelizirana je ranija inicijativa za vraćanje arheološkog materijala iz Zemaljskog muzeja Bosne i Hercegovine u Sarajevu, koji pripada Centru za balkanološka ispitivanja. S obzirom na to da su tokom ljeta 2016. godine, Centru za balkanološka ispitivanja vraćene prostorije u ANUBiH, koje je koristio prije rata, materijali iz Zemaljskog muzeja Bosne i Hercegovine, koji su svojina Akademija nauka i umjetnosti BiH, odnosno njenog Centra, mogu se smjestiti i dalje obrađivati u ovim prostorijama.

Aktuelizirane su aktivnosti na nastavku projekta *Digitalizacija kartoteke grobova prastanovnika zapadnog Balkana*. Posebno kreirana baza u koju su učitani podaci sa kartona koje je Centar za balkanološka ispitivanja čuvao od 1964. godine je nizom okolnosti tokom 2015/16. bila potpuno izgubljena sa servera ANUBiH. Uz pomoć stručnjaka sa Ekonomskog fakulteta u Sarajevu riješen je problem pristupa navedenoj bazi podataka na serveru ANUBiH. U planu je da se u narednom periodu započne sa realizacijom treće faze projekta koja podrazumijeva

sređivanje i uvezivanje podataka radi bolje pretraživosti, sistematizacija i web prezentacija, za šta je neophodno pronaći odgovarajuća finansijska sredstva.

Centar je u 2016. godini ostao bez svog uglednog člana prof. dr. Živka Mikića. Prof. Mikić je jedan od prvih istraživača na polju fizičke antropologije u bivšoj Jugoslaviji, a svojim radom je znatno doprinio razvoju našeg Centra za balkanološka ispitivanja u kome je djelovao od 1972 – 1985. godine. Brojnim autorskim priložima u velikoj mjeri je doprinio kvalitetu i čitanosti Centrovih izdanja.

Sabina Vejzagić